

ODLUKA
O PRIHVATANJU DODATNOG ZADUŽENJA PO SPORAZUMU O
ZAJMU IZMEĐU BOSNE I HERCEGOVINE I OPEC FONDA ZA
MEĐUNARODNI RAZVOJ ZA REALIZACIJU PROJEKTA KORIDOR Vc
DIONICA: NEMILA - DONJA GRAČANICA (ZENICA SJEVER)
PODDIONICA: VRANDUK - PONIRAK

Na osnovu člana 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09, 44/10 i 30/16), Parlament Federacije Bosne i Hercegovine je, na sjednici Predstavničkog doma, održanoj 28.5. i 29.5.2024. godine i na sjednici Doma naroda, održanoj 12.6.2024. godine, d o n i o

ODLUKU
O PRIHVATANJU DODATNOG ZADUŽENJA PO SPORAZUMU O
ZAJMU IZMEĐU BOSNE I HERCEGOVINE I OPEC FONDA ZA
MEĐUNARODNI RAZVOJ ZA REALIZACIJU PROJEKTA KORIDOR Vc
DIONICA: NEMILA - DONJA GRAČANICA (ZENICA SJEVER)
PODDIONICA: VRANDUK – PONIRAK

I

Prihvata se dodatno zaduženje Federacije Bosne i Hercegovine (u daljnjem tekstu: Federacija), po Sporazumu o zajmu (u daljnjem tekstu: Sporazum) između Bosne i Hercegovine (u daljnjem tekstu: Zajmoprimac) i OPEC Fonda za međunarodni razvoj (OFID), u iznosu do 25.000.000 EUR-a za realizaciju Projekta Koridor Vc poddionica Vranduk-Ponirak.

II

Sredstva Sporazuma iz tačke I ove odluke koristit će se za finansiranje tri komponente Projekta, i to:

- građevinski radovi - izgradnja dionice ceste Nemila – Donja Gračanica ukupne dužine 17,6 km, te projektirane brzine 120 km/h, finansiranje preostalog iznosa radova i dodatnih troškova vezanih za dodatna geotehnička istraživanja i geotehničke radove, te izgradnju petlje „Zenica sjever“ s naplatnim kućicama. Premještanje lokalnih cesta uključeno je u ovu aktivnost.
- kupovina zemljišta - finansiranje nabavke potrebne zemlje, uključujući adekvatnu kompenzaciju i pomoć obuhvaćenim vlasnicima zemljišta, u skladu sa zakonima o eksproprijaciji Bosne i Hercegovine i Federacije Bosne i Hercegovine i
- Konsultantske usluge - koje se sastoje od izvedbenog projekta i nadzora.

III

Sredstva Sporazuma iz tačke I ove odluke odobravaju se Federaciji pod sljedećim uslovima:

- rok otplate.....18 godina
- grace period.....4 godine (uključen u rok otplate)
- kamatna stopa..... 2,05 % p.a + šestomjesečni EURIBOR
- jednokratna provizija.....0,5 % na iznos zajma
- provizija na nepovučeni iznos zajma.....0,25%
- dospijeća.....polugodišnje, u jednakim otplatama glavnice
- datumi plaćanja glavnice i kamata..... 15. maj i 15. novembar svake godine.

IV

Potvrđuje se da je razmatrana dokumentacija prihvatljiva za Federaciju, a posebno:

- Sporazum o zajmu između Zajmoprimca i OFID-a, zaključen 23. novembra 2023. godine,
- Nacrt Projektnog sporazuma između OFID-a i Federacije.

V

Sredstva zajma iz tačke I ove odluke Federacija će na kreditnom osnovu prenijeti na Javno preduzeće „Autoceste Federacije BiH“ d.o.o Mostar (u daljnjem tekstu: JP Autoceste FBiH), koje je krajnji korisnik i dužnik po zajmu.

U periodu implementacije Projekta u budžetu Federacije nije potrebno osigurati finansijska sredstva za dodatno sufinansiranje Projekta.

VI

Zadužuje se Federalno ministarstvo finansija da sa JP Autoceste FBiH usaglasi i sklopi odgovarajući Podugovor o zajmu kojim će se, u svrhu redovne otplate, definirati uslovi vraćanja sredstava koja se prenose na kreditnom osnovu.

VII

Daje se saglasnost za zaključivanje Supsidijarnog sporazuma između Zajmoprimca i Federacije i Podugovora o zajmu između Federacije i JP Autoceste FBiH za sredstva iz tačke I ove odluke.

Za potpisivanje Supsidijarnog sporazuma i Podugovora o zajmu ovlašćuje se federalni ministar finansija.

VIII

Za realizaciju ove odluke i izvještavanje zadužuju se Federalno ministarstvo finansija, Federalno ministarstvo prometa i komunikacija i JP Autoceste FBiH, svako u okviru svoje nadležnosti.

IX

Implementacija Sporazuma iz tačke I ove odluke ne zahtijeva donošenje novih ili izmjenu postojećih zakona.

X

Ova odluka stupa na snagu narednog dana od dana objavljivanja u “Službenim novinama Federacije BiH”.

PFBiH, broj: 01,02-02-571/24
Sarajevo, 12.6.2024. godine

**PREDSJEDAVALJUĆI
PREDSTAVNIČKOG DOMA
PARLAMENTA FEDERACIJE BiH**

Dragan Mioković

**PREDSJEDAVALJUĆI
DOMA NARODA
PARLAMENTA FEDERACIJE BiH**

Tomislav Martinović